



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

30 Abril 2021

JSMP husu ba Governu no entidade competente sira asegura ezekusaun fundu Covid-19 no dezastre naturál nian ho transparente no akontável tuir lei

Parlamentu Nasionál iha 23 Abril 2021 liuhusi reuniaun plenária extra-órдинáriu halo votasaun ba Proposta Lei ne'ebé aprova alterasaun dahuluk ba Lei Nú. 14/2020 kona-ba Orsamentu Jerál Estatu 2021 ho votu afavór 44, kontra 0 no abstein 20.

Orsamentu retifikativu ne'e ho nia finalidade atu finansia despeza sira iha serbisu prevensaun no kombate pandemia Covid-19, nune'e mós adota medida sira mitigasaun ba ninia impaktu ekonómiku. Nune'e, ho alterasaun ida-ne'e, iha Fundu COVID-19 sei reforsa hodi finansia medida prinsipál hanesan apoiu ba empregu, moratória sira kréditu nian, apoiu ba estudante sira, seguransa ai-han, apoiu ba profesionál sira liña oin no apoiu ba prevensaun no mitigasaun ba COVID-19.

Alende ne'e, alterasaun ne'e mós introdús orsamentu ne'e, liuhusi reforsu Fundu Reserva Kontinjéncia nian hodi hatán ba dezafiu sira ne'ebé kauza husi inundasaun iha loron 4 fulan-Abril tinan 2021 liubá.

“JSMP konsidera Fundu sira ne'e importante no urjente atu bele finansia programa Governu iha serbisu prevensaun no kombate covid-19, hadi'a ekonomia povu no setór privadu nian ne'ebé afetadu husi pandemia covid-19 no inundasaun. Nune'e, JSMP husu ba Governu no entidade competente sira atu bele asegura ezekusaun orsamentu ne'e ho transparente no akontável tuir lei,” dehan Ana Paula Marçal, Direitora Ezekutiva JSMP.

Relasiona ho ezekusaun orsamentu ida ne'ebé di'ak, transparente no akontável, JSMP husu ba entidade competente sira hanesan Parlamentu Nasionál no Komisaun Anti Korrupsaun (KAK) atu halo kontrolu máximu hodi asegura ezekusaun orsamentu ne'e tuir lei no iha efetividade iha kombate Covid-19 no apoiu comunidade no setór privadu sira ne'ebé afetadu husi kalamidade públiku no hadi'a infrestrutura sira ne'ebé at rezulta husi inundasaun.

Atu asegura supervizaun ka kontrolu ida ne'ebé di'ak no efetivu, JSMP sujere atu Parlamentu Nasionál atu kria Komisaun Eventuál ida atu bele fokus fiskaliza ezekusaun orsamentu ne'e.

JSMP husu mós ba Komisaun Anti Korrupsaun (KAK) atu estabelese ekipa “*task force*” ida ne'ebé nia membru sira bele kompostu husi instituisaun relevante sira hodi tau-matan ba asegura ezekusaun orsamentu ida ne'e ho transparáncia no akontabilidade.

Iha dotasaun Fundu Covid-19, ne'ebé ho montante miliaun US\$31.000.000, hetan ona aumentu ho montante miliaun US\$256.641.793 ho nune'e ninia total hamutuk miliaun US\$287.641.793.

Entretantu, iha parte dotasaun ba Fundu Kontinjéncia ne'ebé uluk ho montante miliaun US\$23.763.372 ho aumentu ho nia orsamentu miliaun US\$41.388.428 sa'e ba montante miliaun US\$65.151.800.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Diresaun e-mail: ana@jsmp.tl
Website: <https://jsmp.tl/>

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275
Telefone: 3323883 | 77040735
www.jsmp.tl
ana@jsmp.tl
Facebook: www.facebook.com/timorleste.jsmp
Twitter: @JSMPtl